



Illos hospes da Taiwan ella cafeteria dalla claustra en cumpignia cullas soras dominicanas da Glion. MAD

## Gronda honor per sora Amata e sora Assumpta

■ (cp) Visetas honoreivlas ella claustra dallas soras dominicanas a Glion: Igl ambassadur dil Taiwan Klement Gu ha visitau ils 23 da fevrer 2018 ensemen cun siu secretari sr. Amata Fässler e sr. Assumpta Krämer ella claustra dallas soras dominicanas a Glion. Omisduas ein stadas duront plirs decennis el Taiwan ed ein segidadas cun differentas lavurs tier la populaziun basignusa. Aschia eis ei stau in grond giavisch dil represen-

tant dil stadi insular d'engraziar allas duas soras per lur gronda lavur e lur engaschi persunal.

Sora Amata e sora Assumpta han giu tut quels onns grond sustegn entras la procura da missiuns dalla claustra. Grazia a donaziuns finanzialas generusas – era dalla populaziun sursilvana – han ellas saviu prestar quell'apurto lavurs socialdiaconicas per sustener ils basignus el Taiwan.

## Il students dalla claustra Mustér sin viadi da concert

■ (anr/ff) L'affischa porta il numer 46, il qual indichescha il contavel concert ch'il Chor dil gimnasi da Mustér vegn a dar proximamein. La turnea sespleiga sur duas finiziuns d'jamna, numnadamein sonda, ils 10 da mars ella baselgia sogn Martin a Trun, dumengia, ils 11 da mars ella baselgia dalla sontga Crusch a Cuera. In jamna pli tard serendan chor ed orchester la dumengia, ils 18 da mars ella Bassa per dar concert ella baselgia da sogn Francestg a Turitg/Wollishofen.

Il dirigent Clau Scherrer ha tscharniu duas ovras enconuschantas, la Missa Sancti Nicolai in G-Dur da Joseph Haydn ed ina cantata da Carl Rütli cul tetel «Miu Segner, miu

Diu». La cantata per chor ed orchester ei enconuschanta dalla canzun dil cumponist Josef Gallus Scheel che ha mess en tuns l'oraziun da sogn Clau da Flia. Il cumponist Carl Rütli dedichescha la canzun cantada per romontsch alla claustra da Mustér, tier la quala el mantegn ina buna relaziun. Joseph Haydn ha cumponiu la «Missa Sancti Nicolai» cura ch'el steva en survetsch dil prenci Nikolaus Esterhazy ad Eisenstadt el Burgenland. Per il di da Sontgaclau, il di dil num dil prenci, menava el si ina messa festiva ella baselgia dil casti. Cun quella cumposiziun ha il meister dalla classica da Vienna creau in impurtonta ovra ellas retschas da sias creaziuns cumpositoricas.

La baselgia claustrala ei enconuschantamein dapresent en renovaziun. Scherrer ha anflau ella baselgia da sogn Martin a Trun in liug adattau per dar concert cul grond chor, orchester e solists. Quels solists ein a nus enconuschant ord auters concerts da Scherrer. Letizia Scherrer, sopran, Barbara Schingnütz, alt, Martin Mairinger, tenor e Clemens Kölbl, bass vegnan a delectar igl auditori sco gia pliras gadas el vargau.

Turnea da concert nr. 46:  
Trun, baselgia sogn Martin sonda, ils 10 da mars allas 17.00  
Cuera, baselgia dalla sontga Crusch dumengia, ils 11 da mars allas 17.00  
Turitg/Wollishofen, baselgia da sogn Francestg dumengia, ils 18 da mars allas 18.00.



Per la davosa gada dirigia Clau Scherrer il Chor dil gimnasi claustral da Mustér. MAD

## NOS LECTURS RAPPORTAN

# Yvonne Margreth – campionesa svizra

Il secund campionadi svizzer da 10 meters tschentau ha giu liug vendergis, ils 23 da fevrer a Berna. Sco il num gi astgan ils tiradurs tschentar la buia d'aria e ston buca sittar liber. Il pli ault siet ei in 10,9 respectiv in da 100. Quella disciplina ei in bien trenament pigl unviern per tiradurs che settan la stad 50 e 300 meters. Ins trenescha d'automatisar mintga siet e rinforza mentalmein il tgau. Tiradurs ch'han contonschiu il 55avel onn da naschientscha astgan separticipar. Per la secunda gada ein era plirs tiradurs dalla Surselva stai dalla partida a quell'ocurrenza. Inagada ei quei la campionesa svizra 2017 tiels seniors, Yvonne Margreth, ella che ha defendiu il tetel, lu era Guido Sgier ch'ei vegnius tierz igl onn vargau.

### Secunda gada bronz per Sgier

Guido Sgier da Sagogn pren, sco igl onn vargau, la medaglia da bronza a casa. Cun 307,9 puncts ha el astgau star sco tierz sil podest. «Il campionadi svizzer ei enzatgei fetg bi», gi Sgier e selegra sin sia secunda medaglia. L'atmosfera seigi fetg buna cun biars aspectaturs che muossien grond interess. La rangaziun sappi semidar suenter mintga soli siet, quei che seigi fetg interessant. «Jeu hai saviu migliurar miu resultat per dapli che quater puncts e sun aschia fetg cuntents», raquenta Sgier. In grond Dieus paghi vegli el dir en num da tuts Tiradurs Sportivs Surselva a Gaudenz Coray che hagi sponsurau ad els in bus, quei che secapeschi buca da sesez. Aschia hagian els saviu ir tuts sis tiradurs dall'unium communablamein a Berna. Era in grond engraziament a Torino Maissen, lur autist ch'hagi menau els segir al campionadi svizzer ed anavos a casa. Gudignau ella categoria da Sgier ha Ruedi Siegfried da Hinwil cun 310,4 puncts avon Michel Buller cun 310,2 puncts. Siegfried ha cun quei resultat sitta in niv record svizzer ella categoria dils veterans-seniors.

### Margreth ha sittau record svizzer

Sco suletta dunna ella categoria dils seniors ha Yvonne Margreth mussau a ses collegas tgi che ha propi gnarva da fier. Avon in onn eis ella vegnida campionesa svizra en quella disciplina. Margreth raquenta ch'ella hagi giu in curios sentiment duront il viadi a Berna. Ella seigi buca stada nervusa, mo x-enzatgei schischevi sil magun. Paterlar cun ses contradurs e

brattar experientschas hagi dau dapli segirtad. In tetel hagi ella gia gudignau, aschia ch'ella hagi da piarder nuot, impurtont seigi da seconcentrar sin sesez. Quei patertgar optimistic ha gidau Margreth era uonn vinavon. Ella rumpa il record svizzer cun 104,0, 104,1 e 104,8 puncts e fa in total da 312,9 puncts. «Jeu level simplemein sittar in meglier resultat ch'igl onn vargau. Il plaz decida lu mia concurrenza», ri la tiradura che ha – sco tenor siu giavisch – saviu migliurar siu resultat digl onn vargau per 2,2 puncts. «Ses collegas Corsin Derungs (5avel), Robert Studer (7avel) e Placi Caviezel (10avel) fan tuts in plaz els top 10. «Jeu sun buca vegnius cullas prestaziuns dils trenaments», sto Derungs tradir, che ha gudignau onn la medaglia d'argien. «Nus essan denton tuts fetg cuntents cun nosa Yvonne», gi el.

Lezza seigi mental fetg ferma, quei seigi enzatgei ch'els stoppien aunc emprendre.

### Tiarza medaglia pils Sursilvans

Il tiradurs sursilvans han era aunc sittau il campionadi svizzer da gruppas il suentermiegi. Allas quater traian ils tiradurs sursilvans profundamein flad e visualiseschan ils da dieschs. Ina gruppa consista da treis tiradurs. Il Tiradurs Sportivs Surselva ein separticipai uonn cun duas gruppas. Che Margreth, Caviezel e Derungs (Surselva 1) ein in bien trio han els gia mussau ellas prerundas duront sequalificacar pil campionadi svizzer: Leu han els dominau e fatg furore cun tuts. L'emprema runda cun 895, la secunda cun 898 e la tiarza cun 890 puncts. Quei ha dau in total da 2683, pia 12 puncts dapli ch'els tiradurs dad Affoltern. A Berna ha la tiradura Margreth sittau 311,0 e ses collegas Derungs 310,5 e Caviezel 307,1 puncts. Quei dat in total da 928,6 puncts e tonscha per la medaglia da bronz. Il secunds ella qualificaziun, ils tiradurs dad Affoltern, ein daventai emprems. Els han gudignau cun 934,9 puncts. «En gruppa havein nus contonschiu la prestaziun da tschei onn», selegran tuts treis tiradurs. «Era sch'jeu hai spitgau da mei in pli ault resultat sun jeu cuntents. A casa settan matei tuts dapli. Cun quei che nus havein dominau las prerundas era la finamira in plaz sil podest», gi Caviezel. «Buca mo l'emprema, mobein era la secunda gruppa da noss'unium ha sittau ferm», constatescha el. Cun Studer, Sgier e Gieri Maissen daventa Surselva 2 siatavels cun 917,0 puncts e gudogna aschia in diplom. Sco finiziun vul Caviezel aunc raquintar enzatgei: La campionesa svizra hagi era sittau ferm en gruppa, cunzin ils davos siets. «In aspectatur ha mirau sin ella e getg ch'el davos siet setti ella matei in da nov», raquenta Caviezel divertent. El hagi buca saviu seretener e manegiau: «Jeu enconuschel bein avunda ella, quei dat in 10,7». – E voilà, in 10,7!



Corsin Derungs, Yvonne Margreth e Placi Caviezel selegran sin lur 3. plaz da gruppa (da sen.).

FOTO T. MAISSEN

Leila Cadruvi